

Unda Parlamentarionan di protocol a keda?

ABUSO CONTRA MUCHA DEN CARNAVAL

ORANJESTAD (AAN) --- Aruba completo por a goza ayera di e carnaval di mucha cu a tuma na Playa caminda un parada basta grandi, a sa di pone tur esnan para banda di caminda disfruta di loke ta carnaval di Aruba.

Gruponan di carnaval a trata di presenta nan mes mas bunita posibel na publico di Aruba y tambe na turistanan cu a bin Aruba specialmente pa e carnaval di Aruba.

Trahenan bunita y precioso

cu a costa hopi placa a worde demostra na e publico, pero loke tabata tristo ta e hecho cu mayornan den carnaval a permiti pa nan yiu a pasa den abuso formal.

Con por ta posibel cu un mama ta permiti pa su yiu para riba un caroz y prome cu esaki yega na altura di Strand Hotel ya e mucha tabata completamente knock out?

Un mucha muher tabata benta riba un caroz y manera

cu tur cos tabata musta, e mucha aki tabata completamente sofoca di e solo cu tabata briya riba su cabez.

Hende grandi mes despues di un parada grandi di carnaval ta keda total loss y con ta para cu muchanan chiquito?

Ayera durante parada tur hende por a nota con cierto criaturanan tabata yora pasobra nan no tabata por mas den e solo cayente cu nan mayornan a pone nan cana den

parada di carnaval di mucha.

Un mucha muher di apenas 6 pa 7 aña tabata benta riba un caroz den solo y aparentemente e mama tabata cana banda di e caroz, pero e unico cos cu tabata interesa e mama tabata cu su yiu por a participa den carnaval.

Esaki ta un abuso contra muchanan chiquito pasobra ki mishi un mama o tata ta laga su yiu benta riba un caroz di carnaval den solo sin atencion berdadero.

Un mucha cu ta na soño benta den solo riba un caroz sin cu tin un hende cu ta puntra su mes con ta para cu e mucha, cu ta benta den solo y kizas e por tin problemanan serio pa cu e temperatura halto cu tin, no ta abuso contra mucha?

Aki SAC y tur esnan cu tin di haber cu carnaval y tambe cuerpo policial a faya barbaramente pasobra na cualkier otro oportunidad autoridnan lo a drenta den

accion mesora, pero debi cu tabata carnaval ayera tur cos tabata posibel.

Milo Croes cu pa decadanan largo tin experiencia cu carnaval no ta conciente cu loke ta pasando cu muchanan den parada di carnaval ta un abuso formal?

Tabata tin grupo ayera cu a tene bon cuenta cu muchanan pasobra nan tabata percura pa e muchanan no tabata constantemente den solo y muchanan tabata haya coy bebe y refresca constantemente.

Ta di spera cu e proximo aña gobierno y polis no permiti abuso contra muchanan sigui tuma lugar den parada di mucha na Playa, pasobra esaki simplemente no por mas.

Parlamentarionan cu tanto a boga pa derechonan di mucha tambe tabata cana den parada ayera y nan no por a wak kico tabata tuma lugar o nan bista no tabata bon ayera?